



TAPAK 10

Michael Jordan indang 'Dream Team' jersey USD 216,000 yong ayok



TAPAK 8

COVID-19 wara mech Sri Lanka nung election thinener

VOL. XVII NO. 174 (ADOK 174) DIMAPUR

RASEMNÜ (WEDNESDAY) RONGCHII (APRIL) 22, 2020

₹ 5.00

Nagaland nung Lockdown benjung amongertemi bendanga agütsü

Dimapur, April 21 (TYO): Intanki National Park telung nung arem shiruru khasetba atema nisung pezüi parnok sasa ketdangsertem ket nung bendanga agütsüogo, ta Mongulbarnü Nagaland Forest Department-i metetdaksü.

Department of Environment, Forests and Climate Change indang Wildlife Wing tsüngdang nisung pezüi parnok sasa bendanga agütsü, ta Nagaland Chief Wildlife Warden-i tanü sangdong ka nung ashi.

Parnokji Longkhum nung Imchainba, Unger village nung Osungkum N Jamir aser Yanger Jamir aser Asangma nung Opangetmsu ta jangjaogo.

Lanur telok ka arem nung süki yanglur, mesü shi akongba aser shitsük ka khaseter aliba video ka social media nung kanga prokshia liasü. Iba atema bushisüngdanga arudang shirurutemji Nagaland kübok Intanki National Park nung khasetba liasü ta bushitet.

"Department - i bushisüngdanga arudang, Lockdown benjung amonger ta shia arem shiruru khasetba nisungtem maitsü jangjatet" ta Chief Wildlife Warden-isa ashi.

Iba ken o ya Wildlife Protection Act 1972 aser tanga ozüngtem kübok maneni bushisüngdang südar, ta paisa shisem.

COVID-19 Rapid Test Kits mamshii atatsü tuyur

New Delhi, April 21 (Agencies): India nung state ajaki anogo ananü atema COVID-19 atema rapid antibody test masütsü atema tetuyuba agütsüogo.

Rapid Test kits nung metokmeperi aliba osangtem angashiba sülen Indian Council Of Medical Research (ICMR)-i tanü iba tetuyuba agütsü aser parnoki iba atema bushisüngdangtsü ta ashi.

ICMR-i coronavirus hot-spots mesüra nisung aika dak coronavirus puteta aliba tesemtem nung tendangtsüla ta ashiba sülen India sorkari Rapid Test kits lakh 5 shi alizüker linük

kübok tesem balala nung alem. Ajisüaka, Rajasthan dena state aikati Rapid Test kits majungba indang osangtem agüja liasü.

"Rapid Test Kits ya state ajak nem agütsü. State kati iba test kits ajanga osang shitak magütsür ta ashi aser iba jagi onoki tanga state asem dang asüngdangya aser parnokia shitak meputeter ta onok dang ashi" ta ICMR ketdangser Dr. Raman R Gangakhedkar-i ashi.

"Taruba anogo ananü ICMR-i rapid test kits amshiba state ajak dangi teshimet nübotem yoktsü aser parnoki samples bener arua yangi tendangtsü" ta Dr. Raman-isa shisem.



(Temalen) April 20, 2020 nikongtsütsü Kiphire district kübok Pungro nung rülong agi kilem onsatsüba angur. (Tsünglanglen) Mokochung district kübok Asangma nung tanü nikongtsütsü 3:30 meta yipru tulu ka süidang ki ka nung kilem ondoktsür aliba angur. Iba yipru ajanga Asangma nung ki ana kanga mejungi raksaba aser ki tenet shi terara raksaba osang angazüker.

Dimapur: COVID-19 putetba dak sendakba nung sample 281 tendangogo

Dimapur, April 21 (TYO): Dimapur nung alir ka dak COVID-19 putetba sülen Marwari Patti aser Murga Patti tesemtem shibanga lir. April 20, 2020 tashi nung surveillance teams-i iba temeket nung kibong 353 semdanga nisung 2347 tashi screen süogo.

April 12 nungi 20, 2020 tashi Dimapur nung COVID-19 putetba nisung den sendaktepa alir nisungtem sample 281 tashi tendanga liasü aser ajak negative ta putetogo, ta Mongulbarnü Principal Secretary Home, Abhijit Sinha, IAS-i metetdaksü.

Mongulbar nikongtsütsü 3:00 ako tashi nung Nagaland nungi sample 537 tendangtsü atema bener yokogo aser iba nung tanü sample 103 yokba dena lir. Tang tashi nung sample 456 tashi negative ta putetba osang nguogo

mangu lir, ta paisa ashi.

Nagaland shibangba mapang April 20, 2020 nungi mapa kar inyaktsü temelaba agütsüogo. Ajisüaka, kechi mapasa inyakdir inyakaka nisung o nisung tsüngda tepila ayutsüla aser health safety telatetbatem sülen anidaksüla, ta Principal Secretary Home-isa metetdaksü Temelaba agütsüba mapatem nung- gari lenmang yangluba, alui tzi mesüokba, renewable energy mapatongtem aser kisüba maparen dena lir. Ajisüaka, item mapa ya tangalen nungi nisungtem anir arua meinyakdaksütsüla, ta paisa shisem.

Nisungtem tejak nembanger ang yimdong nung senzütsüla aser public tesemtem nung metzü memetsütsü ayongzüker, ta Abhijit-isa ashi.

Chief Secretary: Nagaland

Chief Secretary-ia tanga sangdong ka nung state ajunga shibangba mapang inyaktsü melaba mapatem osang metetdaksüogo.

i. Municipalities/Town/Urban stations nungi pilar yimtsüngtem nung gari lenmang yangluba, alu nungi tzi mesüokba mapa, ki aser MSMEs densema industrial projects ajak inyaktsü.

ii. Renewable energy projects inyaktsü.

iii. Municipalities/Town/Urban stations telongtet nung construction projects inyaktsü saka iba mapa nung tangalen nungi nisung anir arua meinyakdaksütsüla.

Mapa inyakba tesem ajak nung nisung o nisung tsüngda tepila ayutsüla aser health safety telatetbatem inyaktsüla.

Angami Kaketshir Telongjemi kaketshirtem yarir

Dimapur, April 21 (TYO): Kohima district nung kaketshirtem atema Angami Students' Union (ASU)-i tebilemstü bena mapa tajung inyaka arur.

Kohima nung akokba tashi timtemer kaketshirtem yaritsü aser kasa mapang nung Kohima nung alirtemi petsaprong mesüi state sorkari tetuyuba balala agütsüba sülen anidaksü mepishir, ta ASU-i Mongulbarnü sangdong ka nung metetdaksü.

ASU-i district administration, District Task Force aser tanga teloktem den külemi timtem ajuruba kaketshirtem yaria arur aser iba tensa nung telok balalai kaketshirtem kanga yaria arudar, ta ASU-isa ashi.

Tang tashi nung ASU-i Kohima nung pei talidaki moutet aliba kaketshir 700 shi yariogo aser iba ya District administration, District Task Force aser tanga teloktem den külemi inyakba lir, ta parnokisa shisem.

Minister Tongpang Ozukum-i anir Kohima District Task Force nungi Advisor Dr. Nicky Kire aser MLA tem, DC-i anir District Administration, SP Kohima-i anir Police Department, Medical & Media fraternity, State Disaster Management Authority, Angami Public Organization, Angami Youth Organization, Angamimiapfü Mechü Krotho aser tanga teloktemi COVID-19



wara anema mapa tajung inyakba atema kanga pelar, ta ASU-isa metetdaksü.

"COVID-19 wara atema alima nung linük shinga renema maliasü, anungji tai tongloktsütepba anener, sensotem külemi longjemmer iba rara nung nokdaksü ayongzüker. Asenok kati ka ajungshitepdi, tebilemba tajungtem lemsatepdi, o tamajung mejembili aser nungdabapur yaritsü atema maneni tenlatepdi" ta parnokisa ayongzüker.

Teyari nungdakertemi tsünglanglen agüja aliba number tem nung ASU den tongtepretepsü akok:

(Vizokho Zashümo) President- 7085178381

(Petekhrietuo Kiewhuo) General Secretary- 7005774044

(Neitsituo Norbert Mere) Vice President- 9862288196

(Ketouletuo Kuotsu) Speaker- 8837007407

"Iba ama lendongbang nung tetsübu timtem ajak tizükteta, tesem balala nung timtemer kaketshirtem alidak kitem tonga oagi yariba temeim mapa tulu asoshi Angami Kaketshir Telongjem dang pelar" ta Kohima District Task Force lennir aser Housing & Mechanical minister, Wb. Tongpang Ozukum-ia metetdaksüogo.

CORONAVIRUS WARAS ENOK LONGJEMER AKOKTSÜ ASOSHI -
Kechalenia Moi Kidang Mongang; Tangar Anasai Tou;
Teni Tebang Sü agi Nembangang; Temang Tashi Itita Yuang;
Kidang ASENTZÜ SENDOKA EXERCISE AGIANG ASER SARASADEMANG.

NAYO-i orphanage & old Age Home semdang



April 21 nü Bright Morning Star Children Home Kohima semdangba mapang NAYO ketdangsertem aser tanga ketdangsertem tangokba noksa nung angur.

Kohima, Rongchii/April 21 (TYO): Northern Angami Youth Organization (NAYO)-i tanü Kohima Orphanage Home, Bright Morning Star Children Home aser Kohima Old Age Home semdangogo.

Item tesemtem semdangba mapang, COVID-19 tashidak pokteter aliba ajanga state ajunga mokdang aliba agi timtem ajurubatem asadanger NAYO-i tenüngdakba osettem lema agütsüogo.

Kasa mapang nung NAYO tir Roko Angami-i, tashidak nungi jenboa alitsü asoshi kümdangshia alitsü tuyuba agütsür aliba sülen tashi angaa anidaksü aser takok tashi pei ki toktsü maotsü asoshi parnok ajungshia liasü.

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA

NOTIFICATION

Dadetd Kohima thet ht April 2020

No. ED/RTE-I/2011 : Any School / Institutewithin the State opting for online education during the current COVID-19 lockdown period shall adhere to the following guidelines:

1. In case the School/ Institution is conducting any online classes using any application/ social media platform, the responsibility to ensure safety of children in the digital space shall be of the School/ Institution.
2. The School/ Institution shall follow all the necessary safety measures given by the authorities from time to time.
3. Participation of children in virtual classrooms should be under parental supervision. For this, Schools/ Institutions should provide orientation to parents.
4. Login IDs should not be made in the name of the students and students should only be attending the online classes/ interaction as a guest.
5. Entire control of the virtual classroom should be with the teacher only so that students are prevented from falling into prey of cyber bullying/ abuse.

Neglecting the safety and security of children in any manner shall attract strict action against the School/ Institution under section 75 of the Juvenile Justice Act, 2015 and other relevant sections of existing laws.

Sd/-
Shanavas. C, IAS
Principal Director.

GOVERNMENT OF NAGALAND DIRECTORATE OF HEALTH AND FAMILY WELFARE NAGALAND: KOHIMA

No. DHFW/COVID-19/2019-20/368-75 Dadetd Kohima the 20th April 2020

CIRCULAR

For the convenience of the public, the Nagaland Medical Council (NMC) has partnered with the Health and Family Welfare Department for providing OPD service in Kohima in the backdrop of the Naga Hospital Authority Kohima (NHAK) being converted to a COVID Hospital. The OPD service will start w.e.f 21st April, 2020 in the following locations:

| PLACE | TIME |
|--|---|
| Para Medical Training Institute (PMTI), Kohima | 10:00 AM to 01:00 PM (Monday to Friday) |
| Agri Forest Sub Centre. Kohima | 10:00 AM to 01:00 PM (Monday to Friday) |

The healthcare professionals who have volunteered their service during the COVID-19 pandemic are being utilized to offer this service. Depending on the availability of the volunteers, this service will be expanded to other locations and districts in a phased manner.

Therefore, any healthcare professional who wishes to volunteer for this initiative may kindly send a message mentioning name, age/sex, qualification, and address to the following WhatsApp number: **940224 5812**.

It may be noted that this service is complementary to the arrangement of specialist consultation in Urban Primary Health Centres, routine services continuing in all other non- COVID health centres, and PMJAY services in empanelled private hospitals.

Dr. Vizolie Z. Suokhrie
Principal Director,
Directorate of Health and Family Welfare
Nagaland Kohima

Dimapur DC-i metetaksür

Dimapur, Rongchii/April 21 (TYO): Government of India, Ministry of Consumer Affairs, Food & Public Distribution letter dak ajemdaker Dimapur Deputy Commissioner Anoop Khinchi-i, OMSS kübok tang linük ajunga mokdang aliba mapang teyari maparen balala inyaker aser lokti nung tajemzükba tia nung alirtem aser bendanger aayangertem atema relief camp tem lapoka inyakba charitable/non-governmental organizations tem nem jangotsütem agütsütem melaba agütsüogo.

DC-isa, FCI depot nungi item teloktem nem wheat seret nung sen 21 aser jang seret nung sen 22 agi agütsütsü shisema lir. Item teloktem nem jangotsü agütsütsü asoshi atakzüka metoktsür ajisüaka mapang ka nung 1 MT dak

tajemba masütsüla. Maneni iba scheme shirnokisa aginer parnoki Dimapur Deputy Commissioner office ajanga apply sütettsü, ta metetdaksüogo.

Tanga sangdong ka nung DC Dimapur Anoop Khinchi-i, department Administrative tekolaktem ajak, Heads of Department aser district department Office balala tekolaktem ajak April 21 nü nungi pei headquarter maitüsü alitsü metetdaksüogo.

District nung aliba AHOD/HOD/Head of Offices tem pei tata headquarters-i oa melera pei district Deputy Commissioner tem den tongteprateper pei headquarters bushia aotsü asoshi tenüngdakba passes/clearance agizüktsü metetdaksüogo.

Bhandari nung state arrtsü maneni shibanga ayur

Dimapur, Rongchii/April 21 (TYO): April 20 nü Chief Secretary, Nagaland-i sangdongba aser Deputy Commissioner, Wokha-i teyuba dak ajemdaker Additional Deputy Commissioner Bhandari, Tiameraen Chang NCS-ia April 20, 2020 nü tetuyuba ka agütsüogo, kong COVID-19 tashidak prokshia meyoktsü asoshi Wokha district kübok Bhandari Sub-division kecha mesenzüdaksütsü, ta 03.05.2020 tashi mokdanga

ayutsü ta metetdaksüogo. Kasa sangdong ajangasa Bhandari Sub-division kübok inter- state arrtsü maneni mokdanga ayutsü tetuyuba agütsüogo.

Inter-state arrtsü aden gari aser nisung shinga mesenzüdaksütsü aser nüngdakba maka nung senzusenpongba gari aser passengers anir private mesera commercial gari kecha mesenzüdaksütsü, ta metetdaksüogo.

Chief Minister ki sanitize sütsü



Kohima, Rongchii/April 21 (TYO): 12th Bn NDRF, Doimukh (Arunachal Pradesh) kübok Sub Inspector K.P. Singh-i anir sub-team kati Kohima nung CM ki sanitize sütsüogo.

Sub Inspector K.P. Singh-i, COVID-19 tashidak dak sendakba nung jet spray machines teyari agia parnoki Sodium Hypochlorite aketba disinfectant amshia, Kohima

nung CM ki temeket merektettsüogo, ta ashi.

District authority aser state medical team nem teyari agütsütsü asoshi 12 Battalion NDRF Rescuers tem biological suit densema Personal Protective Equipment, N-95 face mask, gloves, eye protection, tsüngsem nembangtsü aser Medical First Responder kits ajak renema lir, ta paisa ashi.

Mkg nung mersü takok jenjang metettsü

Dimapur, Rongchii/April (TYO): ASD & Administrator, Mokokchung Municipal Council, W. Manpai Phom-i sangdong ka ajanga Mokokchung Municipal tawabangba kübok aliba tesemtem nung mersü takong seret nung sen 300

(noklang asem) agi ayoktsü latettsüba metetdaksüogo.

Tang letettsüba jenjang ya osang tejangja ka magütsü tashi benoka atatsü aser aibelenertem nem tapet temerenshi agütsütsü, ta kasa sangdong ajanga metedaksü.



Mongulbnarnü Meghalaya Chief Minister Conrad K. Sangma-i anir COVID-19 dak sendakba nung senden ka amendang agiba noksa angur. Tanü tashi nung Meghalaya nung Sample 933 tendangba nungi 821 negative aser 12 positive ta putetogo. Ano sample 100 indang osang ang mangu lir. (Shillong, April 21)

NH 40 atema Ministry of Defence-i ali acre 12.45 agütsü

Shillong, April 21 (Agencies): Mongulbnarnü Ministry of Defence-i Shillong-Dawki national highway yanglutsü atema ali acre 12.45 agütsütsü mulungogo. Kilometer 162.661 talang NH 40 ya Jorabat nungi tenzüker Indo-Bangla arrtsü anasa Tamabil (Dawki) nung tembanger. Shillong kübok Rilbong

nung ministry-i NH 40 yanglutsü atema ali acre 12.45 agütsütsü mulungogo, ta Mongulbar anüngdang Defence secretary, Ajay Kumar-i ashi. NHIDCL-i iba ali ya mapang talangka nungi aginüa aru. NH 40 ya section ana- Guwahati - Shillong (G.S.) section aser Shillong - Tamabil section lemsa lir, ta Kumar-isa ashi. NH 40 nung Guwahati -

Shillong section ya Barapani tashi four lane kümogo aser National Highway Authority of India-i iba lenmang anepalur. NH-40 kübok Barapani nungi Tamabil tashi two lane ji Meghalaya PWD-i anepalur. Rilbong Point nungi Dawki tashi national highway yanglutsü atema JICA funding melaogo aser NHIDCL-i Ministry of Defence dang ali acre 12.45 meshia shidi zülü.

Manipur sorkari nungdabapur nem jangotsü shitak agütsür

Imphal, April 21 (Agencies): COVID-19 aziüoktsü asoshi India ajunga shibanger aliba mapang, Manipur state nung tajangzüük angutsüpur peridaktsütsü asoshi Pradhan Mantri Garib Kalyan Anna Yojana (PMGKAY) kübok Manipur sorkari maneni PDS jangotsü peria lema agütsüdar. PMGKAY kübok April, 2020 atema lezmüksüba PDS jangotsü aser state nung constituency assembly balala atema Open Market Sale Scheme (OMSS) nung lema agütsütsü asoshi, FCI Godowns nungi item jangotsü belener, ta DIPR Manipur sangdong ka nung metetdaksü. Hombarnü, Imphal District nung Assembly Constituency balala atema MLA Local Area Development Fund kübok OMSS jang ajak agi quintal 1437.26 agizüka lir. Jang agizükba rongnung Khurai A/C atema quintal 305.20, Yaiskul AC atema quintal 511.60 aser Wangkhei

AC atema quintal 620.46 densema lir. PMGKAY kübok quintal 1852.95 aser Bishnupur AC atema OMSS kübok quintal 476.95 agizükogo, ta DIPR sangdong nungsa shia lir. Thoubal District nung Wangjing Tentha AC atema quintal 2165.65 (PMGKAY kübok 2051.30 aser OMSS kübok 114.35) aser Wangkhem AC atema OMSS kübok quintal 582.20 agizükogo. Wangkhem AC nung tajangzüük angutsüpurnem OMSS kübok jang quintal 582.20 aser PMGKAY kübok quintal 1358.60 lema agütsüba den külemi Wangjing tesem nung tangalen nungi arur aayangertem nem-a OMSS kübok jang quintal 1.5 lema agütsüogo. Jiribam district nunga Hombarnü FCI Godown nungi Jiribam AC atema PMGKAY kübok jang quintal 861.50 yokogo. Kamjong district nunga Phungyar AC atema PMGKAY

kübok quintal 679.9 tashi kasa anogo nung bener yokogo, ta DIPR-isa metetdaksü. PMGKAY kübok Tadubi AC atema jang quintal 3683.95 shi Senapati District nungi agizüka liasü. Non-National Food Security Act kübok tajangzüük angutsüpurtem atema OMSS kübok jang quintal 961.35 agütsüogo. Hombarnü, Kakching District nung PMGKAY kübok AC pezü atema jang quintal 6762.74 - Sugnu (409.50 quintal), Hiyanglam(628.19 quintal), Kakching (765.50 quintal) aser Wabagai (1959.55 quintal) yokogo, ta parnokisa ashi. PMGKAY kübok Tengnoupal AC nung Moreh Block atema FCI godown, Tangjeng, Thoubal nung jang quintal 160.85 agizükogo. April 19, 2020 nü Imphal District nunga kilen 1263 ayimjema OMSS kübok jang quintal 124 lema agütsüogo, ta DIPR-isa metetdaksü.

Assam nung COVID-19 agi shiranger ka taneptsü nguogo

Lakhimpur, April 21 (Agencies): Assam kübok Lakhimpur district nungi COVID-19 agi shiranger nisung ka taneptsü nguogo. Shirangsang ya tesüiba anogo trok tashi quarantine süa anepaluba sülen Hombar anüngdang Telahi Model Hospital, Panigaon nungi anizüka liasü.

"April 17 nü shirangasang dak virus maliba tendangtetba agi pa mozüki nungi yoktsü asoshi doctor tem jembia telemtetba agi," ta paisa shisem. Tang Lakhimpur nungi shirangsang taneptsü anguba densema Assam nung COVID-19 nungi taneptsü angur nisung 19 jungogo. Osang angazükba agi, shirangsang ya taoba ita Delhi kübok Nizamuddin Markaz nung agiba Tablighi Jamat sentong nung aden aser March tom ka nung pa talidak North Lakhimpur-i meyipa aru. Lakhimpur district nung COVID-19 atema testing kit 250 renema lir aser North Lakhimpur Civil Hospital nung ICU yipden 50 lir, ta Health minister-isa metetdaksü. Iba maparen atema North Lakhimpur nungi nungtugu shishilembar ana- Tarun Dutta aser Narendra Maheswari napronglai Assam Arogya Nidhi fund nem sen lakh 5 tenla agüja liasü.

Assam health minister, Dr Himanta Biswa Sarma aser Lakhimpur district administration ketdangsertem matsüngdang shirangsang ya mozüki nungi anizüka liasü. Mozüki nung osangbener den jembiba mapang minister Sarma-i ashiba agi, April 02, 2020 nü shirangsang indang sample nung COVID-19 aliba tejangja tendangtetba sülen April 4, 2020 nü mozüki anir arua liasü. Inyakyim agi melaba ama, April 16, 2020 nü pa indang sample tem ICMR laboratory Lahowal, Dibrugarh-i yok aser iba mapang pa dak COVID-19 maliba tendangteta liasü, ta Sarma-isa ashi.

Sikkim sorkari journalists nem sen teyari agütsü



Gangtok nung Sikkim Chief Minister Prem Singh Tamang (Golay)-i Press Club of Sikkim President, Joseph Lepcha nem cheque agütsüdag agiba noksa angur.

Gangtok, April 20 (Agencies): Sikkim Chief Minister Prem Singh Tamang (Golay)-i state nung aliba journalists 176 nem senotsü teyari agütsüogo. Golay-i Rs 31.10 lakh indang cheque ji Press Club of Sikkim President, Joseph Lepcha ket nung agütsü aser iba mapang Sectetary, IPR Department, Namrata Thapa aser Press Club züngsemtem liasü. Sikkim nung anogoshi adokba osangkakettem nung journalist 135 shia nem Rs 20,000, hopta shia adokba osangkakettem aser electronic & digital media journalist 41 shia nem Rs 10,000 agütsür, ta Chief Minister-i metetdaksü. Covid-19 wara agi tonga aliba mapang print (daily & weekly publications), electronic

& social/digital media nungi journalist tem nem senotsü teyariji agütsü. Media nisungtemi Covid-19 indang osangtem public nem metetdaksüba atema kanga pelar, ta Chief Minister-i ashi. Osangbenertemi pei taküm lendongi aitsü metsübu osangtem bendena sangdongba atema sorkari iba mapa tila ka ajanga tepela sayur, ta Golay-isa ashi. Sorkari maneni Sikkim nung media züngsemtem yaritsü, ta Chief Minister-isa shisem. Press Club of Sikkim President, Joseph Lepcha-ia Chief Minister dang pelaba metetdaksü. State sorkar tanü tashi Covid-19 anema mapa tajung inyakba atema paisa tenüngsang agütsü.



Mongulbnarnü Agartala nung Earth Day amongtsü anogo ka lia aayangertemi lungru yangludak mapa inyakba noksa ka angur. (Agartala, April 21)



TIR YIMYIM YIMOBILEM (EDITORIAL)

DIMAPUR RASEMNÜ, RONGCHII (APRIL) 22, 2020

Alima anogo

Tanü ya alima anogo (Earth Day) 50 buba amongba anogo lir. Atangji, taküm kümsa iba anogomong ya tapetba aser tajungba amonger, kechiyong taküm kumbo asenok ajak kidang amonger asünungji alima menentsüsa garia mesenzütsü, factory-tem nung mapa meinyaktsü aser janaona mashimashi nung meindoktsü. Alima anogo amongba tetezü, alima ya alima nung alir ajak ki. Alima yabo ka dang, anungji alima nung alirtem asoshi alima ya majung kümra talidak majung akümer asütsü ta angatetsü asoshi amonger. Iba anogo mong nung ya, talisa, tanur aser lanurtem nem tongtibang shilem agidakja amonger, kechiyong asüng iba kidang parnok aser parnok chinur aser semchirseemnurtem alitsü. 1972 küm April 22 nü America nung nisung million 20 shi kima yimdongi adoker alima tzü mopong menena kümdaktsüba mapatem meinyaktsü asoshi tangatetba agüja inyaktü ajungmeso. Atangji, küm 50 jakdang, asenok aikati alima tzü mopong menenba indang memeteti liasü aser jembia mangashi. Ajsüaka, temetetter limatemi anir taoba küm 50 tashi alima tzü mopong memenendaktsüi anepalutsü asoshi küm shia jembipet jembia aruaka, tanü tashi nung alima tzü mopong kanga mejungi kümogo. Ibaji nisungtem taginüba onsara akümba agi, alima nung osettsüset tapu balala yanglutsü asoshi arem lepboka industry-tem lapokdang, alima mekongdaktsüba aser mopong merükdaktsüba arem tululu samapet samar. Aji oda, arem lepdoker industry tululu amenoka aodang, item nung jagi mokozü tanak aser tatsük adoker, mozü tzü tamajung ayong aser tzüyim nung yimokdaktsür aser alima janatsüsa tamakitsü osettem aika adoker. Item jagi ayong aser tzüim nung aliba shirurutema dena taküm melitetsüsa raksatsür. Itemji dang masü, alima nung nütsüng onsara renloker asünungji, item ajakji tebok süngdakja mesütsü asoshi aluyimertemi chiyongtsü akok tashi teimba adokdakja züsentetsü merangdang, alu jungdaktsütsü asoshi ali temo mozü amshiba dang masü saka motong aser aonsutsü raksatsüba shiruru tila tepsettsü asoshi alu nung mozü amshiba ajanga alima nung akhidang meiba süngdonglidongtem aika memeyitetsüsa raksar aser arem malinungji arem shirurutema talidak maka aser chiyongtsüa maka kümadoker. Item tebilemstütem jagi aiben shirurutemi nisungtem alidak aruagi timtem agütsüba angutsü. Aji oda, alima tatsük aküm nungji, temekong lima rüjep agi tenem kuma alibatem ajak yimsaa orr tzüyim nung yimokba agi alima nung tzümetsüng adokdaktsür. Joko, tzüim aika nung asetkong alibatem tzü agi mobanga atur asünungji, yangji aliba nübortem tanga lima tasen ka mesemteta alitsüsa akümba asetkong yimtsüngtem aika lir. Item rongnung Bangladesh nunga yimtsüng aika dena lir. Tanübo asenoki dena alima tatsükba akümba metetter aser tzü mopong menenba ajanga tashidak balala pokteta asenok tim atemer. Item ajakji rajema asenokia tanü ama alima anogomong amongdang, alima ya pei aliba ki ama bilema, iba ki meraksai chirnur aser semchirseemnurtem ajak anisüngzüka lia aotsüsa mapa karbo inyaktüla. Tanü ama kechalenia mao kidang amongba anogo nung ya tanurtem den alima yangluba otsü aser alima topur ajung merksai alitsüba otsü aser shisatsütem benoka sensaksem aka nung junger. Atangji, 'social distance' yuang ta shia kidang mongdaktsübaji, kecha lenia tou ta ashir masü saka tangar den anasatepa tekazü ta ashirba dang lir, anungji asenok temeket nung janaona shishia endoktsüa akok mesüra süngdong ka ana temoka yutsütsüa akok, mesüra ninang aser shinü nunger arua kazütsüsa asenoki naru tsüki yanglutsüa akok. Iba ama anogomong amongba mapang alima nung tzü aser arem nung aliba taküm shirurutem ajak Tsüngremi yangluba takümtem ta bilemteta apayua wazüka ayutsü nungdakbatem jembitsüa tapet asütsü. Alima menendaktsübaji asen ki menener ta angateta asen ki menena aliba ya okteta topur junga kümdaktsütsüsa inyaktü taküm 2020 küm alima anogomong omen "Climate Action" ajanga ayongzüker.

OLEMSABANG

"NISUNG SHIBAI ASÜNG ANGU"

-Tiala Imchen, Dimapur.

(Yashi adok nungi...)

Seer Nostradamus-i pa taküm alidang par jabaso Cesar dang, pa nungi temoatsü agizükang ta züluba oren kar angur:

"Angang kü jabaso Cesar, aser angatetang, ita, anu aser petinutem ajanga tataloktsü aliba kechi sayuogo, ibai tatem makai aliba Tsüngremi sayuba lir. Kü mapang tatembangleni ilunger, anungji ni nungi shisatsü aser sempettem angazükang. Teti aliba Tsüngremi na moajang. Nostradamus, 1st March 1555: From Salon.

Cesar tebu ama tazüngba nung degree anguba nisung masu aser pei sasa meranga bushiba nisunga masu. Pa tebu taküm alidang pai tebu den lia angazükba mapang magitet. Saka kodang tebu asu pai tebu sempettem pa dak keta lir ta sayutsü merang aser Tsüngremi pa den mejembi surnung jembiba ama Vivari town yakta mi agi rongdoktsü ta sangdong. Aser aji shitak ta sayutsü atema pai miima mi senoktsü aser town nung ki aika mi agi mitsü kuma rongdok aser ano paisa nenoki shin o nung temulung magütsüba ajanga takoksa angur ta jembimeso. Saka tenuk küli kar ajanga miji pai senoka rongdoktsü ta putet anungji pa tepseta indok.

T. Mapa 19:13-15 nung Yihuda nunger Puti Unger Shua jabaso 7-i parnok dak temenen tanela aridoktsü ain lir ta shia temenen tanelatem anema Yisu tenung nung ozüng agütsü. Idangji temenen tanelai langzua ashi, "Yisu ni meteter aser Paul-a meteter saka nenok shir" ta shia temenen Tanela aketba nisung jagi parnok dak pungloka parnok ajak akok. Tsüngremi parnok nem temenen Tanela aridoktsü ain agüja mali sernung, lir ama sayutsü merangdang tamakok aser maksu dang angur masu, parnok temang nung zübu keter Jena aoba otsü angur. Yamaji Tsüngrem Tanelai mejembi sernung Tanelai ashir ta ser jembira maksu dang masu takoksa lendong tulu ajurutsü. Ibai tanü asen nubur asoshia tangazüktsü aser tekümdangtsü lesson tulu keta lir, talisa revival amala nung jajartem mesura kiboksem sarasadem senzürtem, aser prayer home amala nung inyaker laymen- tem etc. Tanela Sempettem ya pei jangraba agi marur saka Tsüngremi shir nem agütsütsü mulunger pa / la nem agütsür.

Nostradamus otsü jembir asunung ano pa dangisa meyipdi, tanü tashi Poissonnerie Kong Nostradamus-er Ki liasu, yangji pa Memorial Ki ka yanglua lir aser aji Kaketnang ka mesuka yanglur pai azüngba kakettem aser pai züluba ajak yangji rezünga yua lir. Pa suadoker putu ishika nisungtemi pa taküm aser mapatem amadoker lia tanü tatembangbuba putu nung alima kintemi pa kakettem bushitsü tenzükogo. Pai shinba mangdangtem aika atalokogo aser ano maneni ataloka arudagi.

Tang asen tendak Coronavirus agi alima rangben kangshiba mapang nuburtemi pa shin o tem lepalua bushia züngteper aser Tsüngrem chir tanaben alimai arutsü kishizüng nung lir ta bilema pei tanela jenjang renemtsü meranger. Nisunger tangatetba balala asunung ano karibo anema jembiba Internet media balala nung angur. Nostradamus shin Mangdang indang tang bulua jembiba onük internet nung anguba kar:-

"Nostradamus mentioned the Coronavirus in his prophecies 465 years ago, he wrote in his book 1555 that in the year 2020, a city bordering the Sea of East Asia would have an epidemic that would bring about a great tragedy in human history".

Nostradamus penned his predictions in Vagüe fourlined Poems known as quatrains, divided into chapters called Centuries. The bulk of Nostradamus writings published in 1555 and one of his passages is being circulated on the internet. Thousands of people have shared the following words:-

"There will be a twin year (2020) from which will arise a queen (Corona) who will come from the East (China) and who will spread a Plague (Virus) in the darkness of night, on a Country with 7 Hills (Italy) and will transform the twilight of men into dust (death), to destroy and ruin the world. It will be the end of the World Economy as you know it". Asen o nung- Iba jakrep küm 2020 nung anudoklen lima ka nung Chubatsür ka Corona adoktsü aser manger mesangwa nung tasu Wara alima ajunga nung proktsü aser nisungtem aut aoyi kuma alima raksatsütsü. Idangji alima nung rongsenketzüng nung akoksatsü. Yangi ashiba ama tanü China lima nungi Corona adoka alima ajunga sungogo, aser Italy tenem 7 lima ya, Corona agi sashia atongba tanabuba linuk ka kuma China danga nisung teimba asuba künu nung nisung 700 tema asuba march ita tetenzüklen asenoki nguo. Saka tawabo Spain aser America ama linuktemi ajateta arur dangashi.

Tsüngrem O dangi meyipra- Yiremia 16:4 nung, tasutsü wara tulu agi parnok asutsü. Parnok mang maremtsü, parnok ali tema nung jana ama alitsü, ta ashiba angur. Asenoki Corona wara agi country ka nung dangang sungla kenu nung (24 hours) nisung 700 asuba, USA amala nungbo kenu nung 1000 junga asuba, aser tasumangtem hospital sunga akleptsü ama aleper aliba Video clip nung China, Italy, Spain England aser America nunger linuktem nung atalokba angudang nisung paika to kenu nung koda aremstü ta shisabulua repringogo. Iba sulen tasumangtem to shirurua memeyong aremba aser tasudanga kija rongjenseta pei kinunger dang tatem o ka ashitsübo toktsür tenukia mungui alima nungi pilaa aobatem, aser ano kinungertema pei adianu temeimtiba ka, yaritsübo toktsür pei tenukia mungui asubatem aremdang Ola tulu agi ayima jeba temulung raksaba nguogo. Iba tia jagi asen India lima menebogo. Shin o kodanga nisungi mulungba nung marur ta angatetdi.

Joko asenok alima tatembanglak la nung nokdaka lir ta meteta züzua melili, saka Tsüngrem tali bushidi. Tsüngrem dang asen Jenokdak aser tensa ajak nung anasatiba teyarirji PA lir. Iba Ocet azünger ajak den Tsüngrem Tanelai jembiang ta Sarasademer.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sri Lanka Easter Sunday bomb lendong ajurur küm ka ajunger



April 22, 2029 küm Sri Lanka nung Easter Sunday anogo nung bomb lendong atalokba yangi noksa nung angur.

Colombo, Rongchii/April 21 (Agencies): Taküm bendanga agütsür bomb pokloksürtemi nisung 250 dak tali tepseter Sri Lanka nung küm ka ajungba nüngtem nung tesem ajungalen sentep tsüngsüng akoa liasü.

Saka ita 12 tejakdang Easter mapang tetsür, tebur aser tanurtem tekülem kidang sentong agiba aser raliwalirtem hotel nung chiyongba mapang asürtem bilemteta sentong tulu magi.

Coronavirus tashidak wara azüoktsü mechi Sri Lanka nung March ita nungi curfew benoka lir, kong iba tashidak wara tamajung yagi nisung tenet taküm samaogo.

Taoba küm arishi küm 25 tain Saranya ya ita teku mashisa lia linük yimtiba, Colombo nung aliba St Anthony's Church nung bomb tesashi ka apok. Iba lendong nung la kinungbo asü. Anogo ka lir lai teburchanu ka aso.

"Kü kinungbui par jabaso kodanga mangu. April 22 nung ozü jabaso arishi küm ka ajungtsü, saka onoki koma benjongtsü. Tebu sür tasüng pa asoba anogo lir. Onok asoshi ibai anogo tamajung lir," ta lai osangbener dang ashi.

Anusha Kumari'er kibonga Negombo nung St Sebastain's Church nung kasa anogo lendong ajurua liasü, aser lai küm tetenzüklen osangbener dang ashiba agi, "Kü kinungbo aser tanur ana khen dang asü. Saka nu second shia asür."

Iba lendong nungi jenburtem atema Mongulbarnü sentong tilaka agia liasü. Coronavirus tashidak wara ajanga nüburtem sentong ajunga athi. Asürtem bilemteta nüngshilong ana azünga tekülem sentong aika agitsü sentong liasü.

Bomb trok atonga apokba rongnung mezüngbuba bomb apokba bilemteta linük tesem ajunga nung anepdang 8:45

ako nung nüburtem minute ana süngjema ali. Asürtem nem akhum agüja linük nung aliba television station ajak süngjema aküm.

Iba anogomung bilemteta jembiba mapang, Archbishop of Colombo Cardinal Malcolm Ranjith-i ashiba agi, arogoi lendong agütsür nem tanüla tsütsü tatok agüjaka aibelener nem tim obendang agütsüsüla.

Iba lendong indang bushisüngdang maneni agidar. India nung itdangiter temi iba lendong agütsüsü sentong yangluba indang osang yoka liasü, saka taoba administration nung ketdangsertemi iba osang junga melemsatep, ta parliament nung taoba küm jembia liasü.

"Ittangiter osangtem sorkar ketdangser aser tanishir nem metetdakjaka parnoki bushisüngdang masü," ta Dhulsini de Zoysa-i ashi. Zoysa'er jabaso arishi küm 11 tain Kieran ya kasa anogo Cinnamon Grand Hotel nung tepset.

Taoba küm Easter Sunday nung taküm bendanga agütsür nisung tekui linük tesem balala trok nung bomb pokdakja liasü.

Item bomb apokba osang ya April 21 anepdang 08:45 ako meta mezüng angashi.

Item rongnung bomb asem tekülem ki nung pokloksü: Colombo kübok Kochchikade district nung ka, linük yimtiba north tsütsü Negombo nung ka aser anüdoklen Batticaloa yimti nung ka. Item tekülem ki nung tamangertem sünga adenshir Easter benjong munga liasü.

Bomb asem linük yimtiba nung aliba hotel tulu asem, Shangri-La, Kingsbury aser Cinnamon Grand nung pokdaksü.

Item bomb apokba sülen police temi temulung melemi bilemertem bushiba mapang bomb ana apok. Bomb ka

Colombo south tsütsü Dehiwala tesem nung aser ka Colombo anasa Dematagoda district nung poka liasü.

2019 küm Easter Sunday nungsa Colombo anasa linük indang airport tongtiba nung bomb ka nguteta raksa indok.

Tasüngji Colombo nung tekülem ki ka anasa bomb ka poka liasü. Lendong agütsürtemi amshiba gari ka nung bomb ka raksaa indoktsü merangba mapang aoksa apok.

Iba lendong nung nisung tajemba agi 253 asü. Mezüngbo iba lendong nung nisung 359 asü ta sangdonga liasü, saka sorkari asürtem züngdangba melenshitsü.

Iba lendong nung arogo züngsemtem aser hotel tem nung inyakertem asü.

Zion Church nung Ramesh Raju ta ser nisung kati bomb pokdaksür tekülem sentep agiba telungi maitdaksü nokdangba mapang asü. Ramesh-i iba mera agiba ajanga nisung aika taküm kümzük, ta ashir.

Iba lendong nung bendangera aika asü. Item nisungtem ya UK, Denmark, Portugal, India, Turkey, Australia, the Netherlands, Japan, Switzerland, Spain, Bangladesh, US aser China nungi arurtem liasü.

Lendong agütsür mapang tatsüka lir Sri Lanka ketdangsertemi, par linük nung aliba National Thowheed Jamath (NTJ) telungpur mapa lir, ta sangdonga liasü.

Islam nung sayutsüngir Zahran Hashim ya tanishir ka sür bomb ya pokloksü ta ashir. NTJ ya Zahran Hashim-i tentet saka iba telok nungi pa mindoker liasü. Pa Colombo nung aliba hotel ka nung pokseta asü, ta ashir.

Saka Islamic State telungpur telokia iba lendong agütsüba tenüng agia lir.

ANOGO ABEN TSÜNGREM DEN

LENISÜBA TANELA (YOHAN 14:14-26)

"Ochi Tanelai nenok ajak ochiba dangi anitsü."

Yohan 16:13

Tanabuba tangatetba tanelaji, Tanela Temeshi Kibuba Yisui Tanela Temeshiji asenok Teyarir aser Lenir ta metetdaksü. Pai asenok ochiba dangi anitsü. (Yn. 16:13).

Tanela Temeshiji tamanger shia dak alir aser tzüra temdaksür. Kodang tesayuba Tsüngrem nungi mesülir idakji jangratem aser tipdem ka malitsü. Iba indang tenyar Yohani tejangja ashi. "Shirnoki nenok mashileni anisar, parnok indang ni item o nenok dangi züluogo. Pa nungi nenoki kechi mezüja shimtetba angu, aji nenok dak alinung, kari nenok dang sayutsü, aji nenok tenüngdaksü maka. Saka Pai mezüja shimtetba jagi kechisarena indang nenok dang sayu nung, aser aji ochi asünung, tiyazü masü, aser aji agi nenok dang koda sayu, aji oda nenok dak liang" (1 Yn. 2:26,27). Iba osang yagi arogo nung tamangertem aintsü sayuba indang mashir (Ef. 4:11-13). Saka arogo nung tiyazü tesayurtem, shirnoki na ashioktsüsü meranger parnok indang jembir.

Tanela Temeshi asenok nem tiyazü tesayuba anema tekümdangtsü agütsür (1 Tim. 4:1). Tamanger kari tiyazü tesayuba kar mesüra jungkai adokba kar Khristan telok nung amshitsü merangdir pai Tanela Temeshi jashidaksüra! Pai "tatok makaba temenen" menar! Iba yagi Lucifer nem masadangtetba maongka agütsür. Tanela Temeshiji ochi tanela, anungji tiyazü tesayuba agi pa peladaksüsü makok.

Pauli 1 Tesalonikia 5:19-22 nung Tanela remsepdaksüba mapa asem sayur.

1) Sayutsüngiba mezüngmeshi masütsü

2) Ajak tendanger tajungba ametang

3) Tamajung kechisarena nung pilaa liang. Tesalonika

arogonung Grik nung süngyanglu külemba yimya tesayuba kar lir ta Pauli putet (Tesa. 3:5). Junga mangateti sayutsüngiba ajanga Asentenshi sayutsüngidang sayutsüngiri mezüngbuba onük nungji aibelener. Metendangi agizükba aser tamajung nungi pilaa maliba jagi ajemaluba Tsüngrem Tanela tali jashidaksüra, aser asenok dak aliba Tanelaji remsemdaksür, tangar tanelatem ajak sakdaksür. Tanela Temeshi-i ola matoki tangar tanelatem inyakba ajia dangbo malitsü. Pa tenük meyiba Tanela lir!

Tanela Temeshi arung, kechiaser Na ajanga ainkartemi zülu aser jembir, ochiji lapokang, Na sapi lir, Temeshi Kaketji lapokang! (Charles Wesley, 1707-1788).

India nung Khristanpur temaitsütem indoktsü

Rongchii/April 21, 2020

(Agencies): India nung Daddasagarahalli yimtsüng aser temeket tesemtem nungi Khristanpur arempa tesem nung feet 12 talang Yisu kerakyanglu ka liasü. Iba kerakyanglu den Khristanpur temaitsütem küm 30 nungi 40 tsüngda iba tesem nung liasü, saka March ita tetenzüklen ketdangsertemi indoktsü.

Alima tesem ajunga nung COVID-19 tashidak wara agi sünger aliba mapang Khristanpur tamangba yimsü mechi reshikangshiba tensa tamajungba akümer.

"Ibai ozü yimtsüng nung nüburtem tsüngda yimjung nung aliba raksatsür aser Indian constitution nung agüja aliba tamangba yimsü temeden nung aibelenba ka lir," ta Archbishop of Bangalore, Reverend Dr. Peter Machado-i sangdong ka nung ashi.

"Doddasagarahalli nung ozüng agi mela latettsüba leper nungi Yisu indang kerakyanglu tashiyim amshia indoktsüba ya

kanga tai, ta Bangalore nung aliba Khristanpuri züngshir."

Iba leper ya tamangba yimsü melenba maparen nung amshir ta olulu adokba ajanga iba tesem nungi Yisu kerakyanglu aser danga osettem ya indok südi, ta Archbishop-i ashi.

Yimtsüng nung alirtemia yimtsü nung Khristanpur aliba ya timtem masü ta ashir, ta Archbishop-isa ashi.

"Khristanpur ya yimjung meimba nisungtem lir, shirnoki linük ozüng sülen anidakeer. Aser parnoki kin, sentsü mesüra tamangba yimsü balala süaka akokba tashinung linük asoshi bendanga agütsür inyaker," ta pai ashi.

Iba kerakyanglu ya Lent mapang indoktsü, aser Archbishop-i Bangalore nung aliba Khristanpur dang item oset indoktsü nem tatok meshija sarasademtsüsü ajungshia liasü.

"Oba Tsüngrem, nai parnok dang tai tokang, kechiaser parnoki kechisa inyaker, aji parnoki memetet," ta Archbishop-i sarasademtsü.

OLONG PAITEP # 5434

| | | | | | | | | | | |
|----|--|----|--|----|--|----|---|----|--|---|
| 1 | | | | 2 | | | | 3 | | 4 |
| 5 | | 6 | | | | | | | | |
| | | | | | | | 7 | | | |
| 8 | | | | | | | | | | |
| | | | | | | | | | | 9 |
| | | 10 | | | | 11 | | | | |
| | | | | | | | | | | |
| | | | | 12 | | | | 13 | | |
| 14 | | | | | | | | | | |
| | | | | | | 15 | | | | |
| 16 | | | | | | | | | | |

| | | | |
|-------------------------------|-------|-------------------------|-------|
| TIPILEN | | LANGTSÜNGLEN | |
| 2. Auo nung chiyongtsü asenba | - (7) | 1. Lenmang | - (7) |
| 5. Mangyimba mapang | - (5) | 2. Aor kidong ka tenüng | - (6) |
| 7. O tamendakdak | - (4) | 3. Tenarong maten | - (6) |
| 8. Pei dak malangba | - (7) | 4. A _ _ _ g | - (3) |
| 10. Juli | - (7) | 6. Mopung apodoka | - (3) |
| 12. Sen ayudak | - (7) | ola adokdaksüba | - (3) |
| 14. Tenük agi ajitet | - (4) | 9. Tongtipang tagitsü | - (7) |
| 15. Tamajung aküm | - (5) | 10. Menungra bilem | - (6) |
| 16. Apuso | - (7) | 11. Aiür | - (6) |
| | | 13. S _ _ _ k | - (3) |
| | | 14. T _ _ _ r | - (3) |

OLONG PAITEP # 5433 TELANGZÜBA

| | | | |
|-----------------------------------|--|---|--|
| TIPILEN : | | LANGTSÜNGLEN : | |
| 1. Yiar, 3. Tesola, 7. Yimra, | | 1. Yimti, 2. Amen, 4. Shiner, 5. Alaka, | |
| 8. Tangar, 9. Peria, 10. Tanur, | | 6. Satan, 9. Putet, 10. Tembar, | |
| 11. Tasen, 13. Lemjem, 15. Tambu, | | 11. Tatok, 12. Amang, 14. Jala. | |
| 16. Khuret, 17. Sang. | | | |



TANÜBO NAI LANGZÜANG

Q. Food Corporation of India ya koba küm tenzüka liasü?
 A. 14 January 1965 B. 14 February 1965
 C. 14 March 1965 D. 15 June 1965
 _____ (Taruba adok nung onoki langzütsü)
YASHI ADOK TELANGZÜBA: Won

Happy Birthday

TENÜNG : TSUNGCHILONG JAMIR (AKHOVA)
 TASOBA ANOGO : 22/04/2019
 KÜM : 1 (ONE)
 TALIDAK : KUDA 'B' DIMAPUR

Tsüngrem taochi agi jabaso Tsungchilong mezüng tasoba anogo tashi temoatsüma nung anir aruba asoshi Tsüngrem nem tenüngsang agütsür. Maneni jabaso anema aliba den arishi talang moajang ta tsürabur aser kinunger ajaki Tsüngrem dang sarasademtsür.

"HAPPY 1ST BIRTHDAY"
 - Temeim Oja, Oba, Atsa, Otsü, Obu & Kinungertem.

NAI-A YA METETTER MA?



SUDOKU # 5476 TELANGZÜBA # 5475

| | | | | | | | | | | | | | | | |
|---|---|---|---|---|---|---|---|---|---|---|---|---|---|---|---|
| 4 | 1 | 5 | 2 | | 6 | | 4 | 2 | 7 | 3 | 5 | 1 | 9 | 6 | 8 |
| | | 3 | 8 | | | 9 | 9 | 5 | 1 | 8 | 6 | 2 | 4 | 7 | 3 |
| 7 | | | 6 | | | | 6 | 8 | 3 | 4 | 7 | 9 | 5 | 1 | 2 |
| 5 | | | 7 | 4 | 6 | | 8 | 1 | 9 | 4 | 5 | 8 | 3 | 7 | 2 |
| | | 2 | 5 | 9 | | 6 | 2 | 7 | 5 | 9 | 1 | 6 | 8 | 3 | 4 |
| | | 9 | 1 | 2 | | 5 | 8 | 3 | 6 | 2 | 4 | 7 | 1 | 5 | 9 |
| 9 | | | | | 1 | 5 | 3 | 4 | 8 | 7 | 2 | 5 | 6 | 9 | 1 |
| 1 | 5 | 6 | | | 2 | | 7 | 6 | 2 | 1 | 9 | 8 | 3 | 4 | 5 |
| | 8 | | | | | 7 | 9 | 5 | 1 | 9 | 6 | 3 | 4 | 2 | 8 |

OJANG LUTEP # 5024

NGATAR :
 TLUEMUNG :
 SÜSYIRUSÜDAKTTA :
 SMAÜ :
 AKSA :
 TSTTISHIAÜ :
 TUNAJG :
 AGTTSITEÜSA :
 ENASI :
 TSÜYAINKLA :

OJANG LUTEP TELANGZÜBA # 5023

ASENI MEPETMESÜ SÜSHIA TETSÜDKAKTSÜ AJANGSHIBA
 AJAK PAIDOKTSÜSA TSÜNGREMI LENMANG LAPOKTSÜR

TAN HOPTA ATEMA - KOMA SÜLA ?

Q. Tang ya nübertem asoshi jangotsü dangbo, ano, mozü kidang shirangertem asoshi ventilator tenüngdakba kümogo. Anungji, asenok kija kibong aser arogoi Covid hospital nung amshitsü atema ventilator ka jenjang, ana jenjang, pongo jenjang aser ter jenjang ta pei pei akok Mokochung, Dimapur aser Kohima District hospital-tem nem tenla agütsü nunga koma süla?



New Delhi, April 21, 2020: Mongolbarnü Parliamnt, New Delhi nung Lok Sabha Speaker, Om Birla-i Vidhan Sabhas aser Vidhan Parishads nungi Speakers/Chairpersons den Coronavirus dak sendakba nung video conference senden amenba noksa nung angur.

India nung Covid-19 tashidak agi nisung ajak agi 590 süogo

New Delhi, Rongchii/April 21 (Agencies): Mongolbar tashi nung India nung Covid-19 tashidak agi nisung ajak agi 590 süogo aser nisung 18,601 dak iba tashidak putetogo, ta Mongolbarnü Union health ministry-i metetdaksü.

Tang linük nung Covid-19 agi teshirangdak 14,759 lir, nisung 3,251 bo anepadokogo aser nisung kabo bendangleni ogo, ta Helath ministry-isa metetdaksü.

India nung iba tashidak puteta alir rongnung bendanger 77 densema lir.

Hombar aonung nungi tenzüka Mongolbar tashi nung (tesüiba ghonda 24) iba tashidak agi nisung 31 asü, aser asürtem rongnungji Rajasthan nungi nisung 11, Maharashtra nungi 9, Gujarat nungi pezü, Delhi, Telengana aser Tamil Nadu shia nungi nisung anana aser Uttar Pradesh nungi ka densema lir.

Linük nung iba tashidak agi asür 590 nungi Maharashtra nungi nisung 232, Madhya Pradesh nung 74, Gujarat nung 71, Delhi nung 47, Rajasthan nung 25, Telengana nung 23 aser Andhra Pradesh nung nisung 20

densema lir.

Uttar Pradesh nunga iba tashidak agi nisung 18 süogo, Tamil Nadu nung 17, Punjab nung 16, Karnataka nung 16 aser West Bengal nunga nisung 12 süogo.

Maneni Jammu & Kashmir nungi iba tashidak agi nisung 8 süogo, Kerala aser Haryana naprongla nung nisung asemsem, Jharkhand aser Bihar na nung anana, Meghalaya, Himachal Pradesh, Odisha aser Assam shia nung nisung kaka süogo, ta Mongolbarnep Health Ministry-isa metetdaksü.

ICMR-i states dang taruba anogo ana rapid test kits mamshitsü tuyu

New Delhi, April 21 (Agencies): Coronavirus tashidak tendangba oset- rapid test kits nung timtem aliba tashishiba otem nung ajemdaker Mongolbarnü Indian Council of Medical Research (ICMR)-i state tem dang taruba anogo ana tashi rapid test kits mamshii atatsüla, ta metetdaksü.

ICMR-isa, parnok team-i item osetji tendanga bushisügangdangba sülen ang tetuyuba ka agütsüsü, ta metetdaksü.

Linük nung coronavirus tashidak dak sendakba nung anogoshia ketdangsertemi osangbenertem den jembir, ajioda Mongolbarnüa osangbenertem den jembidang ICMR nungi Dr Raman R Gangakhedkar-i, rapid testing kits nung timtem lir, ta shia pa

dang ashishia asügangdangogo, ta metetdaksü.

Dr Raman-i, "Yashi state ka dang nungi onoki tashishiba nguogo, aser iba atemaji tang tashi nung onoki state asem denbo jembio. Rapid test kits aser RT-PCR kits nungi anguba result dak sendakba nung osang bakala aika lir. Onoki state tem dang taruba anogo ana tashi item kits mamshii alitsü mepishir," ta metetdaksü.

"Onok indang teams-i tesem balala semdanga item osetji tendangtsü. Iba sülen anogo ana tsüngda onoki osang tejangja agütsüsü. Item oset kar nung timtem lira onoki company tem dang melentsü atema asügangdangtsü," ta paisa ashi.

Pai ashiba agi, linük nung tang tashi nung coronavirus

tashidak atema samples 4,49,810 tendangogo aser iba nungjagi sample 35,852 bo Hombarnü tendang.

Samples 29,776 bo ICMR network kübok lab 201 nung tendang aser nija lab 86 nung samples 6,076 tendang, ta pai shisem.

Mongolbarnü New Delhi nung osangbenertem senden nung Health Ministry nung Joint Secretary, Lav Agrawal-i, tang tashi nung linük nung nisung 18,601 dak coronavirus tashidak putetogo, ta metetdaksü. Paisa, tang tashi nung nisung 3,252 anepogo aser iba nungjagi nisung 705 bo yashi (April 20) anep, ta ashi.

"Ibaji ajanga linük nung iba tashidak anepba shilemji 17.48 adoker," ta paisa shisem.



New Delhi, April 21, 2020: Mongolbarnü New Delhi kübok Azadpur Sabzi Mandi nung Minister of State for Home, G Kishan Reddy-i süngjanglijang ayoker ka den jembiba noksa nung angur. Linük shibanga aliba melapok tashi Azadpur Sabzi Mandi bo anogoshia lapoktsü.

Totzü jenjang ajemba tajangzükji nübur nem agütsüsüla: Congress

New Delhi, Rongchii/April 21 (Agencies): Mongolbarnü Congress party-i Centre sorkar dang, International crude oil jenjang ajemogo, anungji kechiba sorkari linük nung petrol aser diesel jenjang majemer, ta asügangdang.

Congress lenir, Rahul Gandhi-i, iba sorkari kodang tashi angatsü aser petrol o diesel jenjang ajemtsü, kechiyong tang tashi petrol litre ka nung sen 69 aser diesel litre ka nung 62 agi ayoker, ta metetdaksü.

Rahul-i Hindi oshi nung twitter ajanga, "Alima nung totzü tazü (crude oil) jenjang kanga ajema kümogo, ajisüaka kechiba asen linük nungbo petrol litre ka nung sen 69 aser diesel litre ka nung sen 62 agi ayoker. Tang ama tensa (coronavirus tashidak) ka nung (totzü) jenjang ajemra tajung asütsü. Iba sorkari kodang tashi angatsü?" ta asügangdang.

Ano külen Congress party nung tongti otongdar, Randeep Surjewala-i, totzü jenjang \$0

kübok aluogo, ajisüaka iba sorkari ola madoker aser petrol o diesel jenjang majemer, ta ashi.

"WTI Crude Oil barrel ka nung \$0 den tajemba kümogo! Ajisüaka asen nüburtemi maneni petrol litre shia sen 69.59 aser diesel litre shia nung sen 62.29 agütsür (Delhi nung)," ta pai metetdaksü.

"Kechiba Modi sorkari ola madoker? 'Pei sasa linük meimertem' ta jembirtemi joko shisadanga nüburtem nem anisügangzük agütsüsüla," ta Surjewala-i twitter ajanga metetdaksü.

Maneni Congress nungisa otongdar, Pawan Khera-i, alima nung totzü jenjang kanga ajemogo, anungji kechi kuli ajanga sorkari totzü jenjang majemer?, ta asügangdang.

Paisa, yasüng tu putiotsü asütsüsa ka atalokogo, kechiyong storage capacity maliba agi International crude oil jenjang kanga ajemogo, ta metetdaksü.



Chatra (Jharkhand), April 21, 2020: Mongolbarnü tzunglu kanga sashia aruba ajanga Jharkhand kübok Chatra district nung Geruwa apu tera chirepa aliba noksa nung angur. Tang tashi nungbo iba lendong nung nisung asü-amaba osang mali.

Covid anema sorkari Disaster Management Act nung Arrla 35 benoker

New Delhi, Rongchii/April 21 (Agencies): Coronavirus tashidak nokdangtsü atema Central sorkari Disaster Management Act kübok Arrla 35 benokba sülen opposition leniba nung state temi ibaji anema ola adok tenzükogo.

Iba Act kübok Arrla 35 ozüing ajanga Inter-ministerial central teams (IMCTs) tenteta state tem dangi yoka tensa asadangtsü, state ketdangsertem nem tetuyuba agütsüsü aser iba report ji sorkar nem agütsüsü atema Union Cabinet sorkar nem tashi/temelaba agütsür.

Ajioda Ministry of Home Affairs (MHA)-i iba ama team trok tentetogo, aser tang atemabo bureaucrats leniba nung item team jagi coronavirus tashidak agi mejungi kongshia aliba tesemtem semdanga state sorkari inyakba mapatem asadangtsü.

Parnoki asadanga bushisügangdangba maparen nungi health care professionals anema inyakba, nisung o nisung na tetsüngda ittepa alitsü ozüing

aser jila/yimitem nung gari senzüsempogba densema lir.

"Item team jagi linük shibangba tsütsü sorkar telatetbatem nung rangloker asadangtsü, nüngdakba chiyungtsü supply asüba jenjang, health infrastructure jenjang, health professionals kümzüka aliba jenjang, aayangertem aser sensakertem atema amenokba relief camps jenjang asadangtsü," ta Ministry of Home Affairs (MHA)-i metetdaksü.

"Linük shibangba tsütsü telatetbatem alema inyakba osangtem lir, aser iba nungi nübur atema lendong keta lir," ta MHA-isa metetdaksü.

West Bengal Chief Minister, Mamata Banerjee-ibo item team ji ashishiba dang masü saka parnokji magizüktsü, ta shiogo.

MHA-i team ka Rajasthan state-i yokogo aser iba team nung tongtiji Department of Financial Services nung Additional Secretary, Sanjiv Kaushik lir aser züngsemtemji Ministry of Health & Consumer Affairs nungi ketdangsertem lir.



April 21, 2020 nung tangokba noksa ka nung Beirut, Lebanon kübok UNESCO Palace nung Lebanese Parliament amenba noksa nung angur. COVID-19 tashidak wara mechi nisung tetsüingda ita alitsü asoshi Lebanese Parliament ya Beirut nung aliba UNESCO Palace nung agi.

COVID-19 wara mech Sri Lanka nung election thinener

Colombo, Rongchii/April 21 (Agencies): Coronavirus tashidak wara mechi Sri Lanka nung parliamentary election ita ana jungnüa thinena June 20 nung agitsü lemtetogo, aser iba asetkong linük nung COVID-19 tashidak wara agi nisung tenet taküm agiogo aser nisung 295 menepa lir.

Ita trok jelia Tir Gotabaya Rajapaksa-i March 2 nung Parliament shibangtsü aser April 25 nung election agitsü lemteta liasü.

June 20 nung election agitsü asoshi National Election Commission nungi züingsem asemi meyongnem agüja aliba sangdong ya Hombarnü agitsü.

Health aser security ketdangsertem den shisa lemsatepba sülen iba telemtetba ya agi, ta sangdong ajanga ashi.

Election anogo thinenba ajanga constitution tsütsü mangatetep adokra kechi asütsü, ta linük nung temaba court danga shisa agiteptsü asoshi Election Commission ajanga Tir Rajapaksa dangi zülua liasü.

Election Commission ajanga ashiba agi, election thinenba ajanga June 2 nung parliament senden magitetsü, koba March 2 nung parliament shibanger ita asem ajunger.

Saka election anogo latettsü asoshi Supreme Court shilem agitsü menüingdak aser iba anogo lemtettsü ya election commission mapa lir, ta Rajapaksa-i ashi.

Iba telemtetba magidang election commission-i sorkar ketdangsertem den senden mena linük nung wara ajanga election inyakyim nung tetsükdaktsü ajuruba tensa asadanga liasü.

Tesüiba ghonda 24 tsüingda coronavirus tashidak aoksa nisung 41 dak putetba sülen Hombarnü sorkari linük ajunga nung curfew benoka aliba April 27 tashi atsülangtsü telemtetba agi.

Rongsenketsüing ajungkettsü mechi Hombarnü nungi tenokdangba kar nagientsü asoshi sorkari Deobarnü sangdong.

Iba asetkong linük nung coronavirus tashidak wara

nungi nüburtem jenbua alitsü mechi March 20 nungi curfew benoka lir.

Election arrsanga agiba mapang kanga kümdangtsü asoshi opposition party ajak aser civil society balalai sorkar ajungshia lir.

Sri Lanka nung nisung 295 dak COVID-19 tashidak wara puteta lir, aser item rongnungi nisung tenet süogo aser nisung 96 taneptsü nguogo. Iba linük nung coronavirus ya March 11 nung mezüing puteta liasü.

Rajapaksa-i parliamentary election ya ita trok agi jelia agitsü sangdongm shiba November ita linük tir ka ama shimteta liasü. Pa sentong takok ngua inyaktsü asoshi Rajapaksa-i parliament tasen ka aginer.

May ita nungi sorkar mapa inyakba nung senotsü amshitsü asoshi temelaba agitsü atema parliament jateptsü ajungshir.

Sri Lanka constitution nung Parliament shibanga aliba ya ita asem tsüingda melentsüla, ta ashir.

Taoba parliament nung sorkari senotsü April 30 tashi indoktsü dang agizüka lir.

Pakistan-i Watch List nungi kiralongrar 1,800 agien

New York, Rongchii/April 21 (Agencies): Alima nung senotsü tim lenmang masüba nung amshiba mitba lokti tentet, FATF ajanga asadangtsü lia Pakistan-i 2008 küm Mumbai amakba tasa yanglur aser LeT operations commander Zaki-ur-Rehman Lakhvi densema kiralongrar 1,800 shi watch list nungi angien, ta US nung amenoka aliba telok kati ashi.

Pakistan nung aliba National Counter Terrorism Authority mesüra NACTA ta ajaba tentet yagi temulung melemi aliba kiralongrar nem senotsü teyari agütsüba nokdangba nung shilem agir aser parnoki kiralongrartem tenüing ya bendener.

2018 küm iba list nung nisung tenüing 7,600 liasü. Tesüiba ita 18 tsüingda iba list nung nisung 3,800 dak kümer liasü, ta New York nung aliba regulatory technology company, Castellum.AI ajanga ashi.

March ita tenzükba sülen iba list nungi nisung tenüing 1,800 shi agienogo, ta Castellum ajanga data bendenba nung shia lir.

Pakistan-i Paris nung amenoka aliba The Financial Action Task Force (FATF) den pangjemba ama inyaker, koba ajanga kiralongrar

nem senotsü teyari agütsüba nokdangba mapa inyaker.

FATF ajanga totuyuba bagütsüba nung shilem ka ama Pakistan-i item kiralongrar tenüingtem ya indok südi, ta ashir.

Pakistan-i kiralongrar nem senotsü teyari agütsüba nokdangba mapa junga meinyaketba ajanga FATF asadanga nung mejungi ajiteta Pakistan-i mera 27 agitsü aliba nungi mera 14 dang agi aser tanüingba nung mera junga magi, ta FATF-i February ita shia liasü.

Pakistan-i iba mera agiba indang FATF ajanga June 2020 nung asadangtsü lir.


Pakistan ya tang FATF indang 'grey list' nung lir aser parnok ya kiralongrar nem senotsü teyari agütsüba nokdangtsü asoshi ozüing mamshiba linüktem rongnung mezüingoktsü mechi ita ishika kanga meranga iba mera agia arur, kechiaser item linüktem nung züingoksemra lokti tentet aikati Pakistan nem senotsü teyari magütsütsü.

Pakistan indang list nungi tenüing agiener alirtem ya karbo US mesüra United Nations ajanga kiralongrar tenüing bendena aliba nung züingoksema alirtema lir, ta Castellum.AI ajanga ashi.

Nisung kar tasoba anogo mesüra NACTA indang list nung national ID number maliba ajanga item nisungtem junga mejangjateter, ta osang ajanga ashi.

Castellum.AI ajanga ashiba agi, parnoki Lashkar-e-Taiba lenir tenüing, Zaki Ur Rehman Lakhvi ya Pakistan Proscribed Persons list nung bushitsü merandang, saka pa tenüing mangu. Anungji tenüing maliba ya shidak asünungbo Pakistan-i Lashkar-e-Taiba lenir tenüing ya kiralongrartem watchlist nung meinok.

Wall Street Journal ajanga ashiba agi, item nisungtem tenüing indokba atema yimjak nung kuli magütsü, saka Pakistan ketdangertemi email ajanga sensaksemba mapang, item ya linüki kiralongrar anema nokdaktsü merangba nung shilem ka lir ta ashi.



COVID-19 WAR ROOM

NAGALAND

HOW TO AVAIL COVID-19 RELIEF FUND

GO TO WWW.IAMSTRANDED.NAGALAND.GOV.IN

01

Submit Details

- Go to website
- Fill up details
- Submit form

02

Verification

State Control Room sorts out applications state-wise on a daily basis
Authenticity of application verified with help of respective Students Union/ Nagaland House/ Fellowship

03

Assistance Provided

Financial assistance is sent to bank account of verified applicants.

WHO CAN APPLY?

Citizens of Nagaland who are presently outside the state as a student, working professional or patient, facing hardship because of the nationwide

WHAT DETAILS ARE REQUIRED?

- Aadhaar /Government issued ID
- Bank account with IFSC details
- Working Mobile Number
- Address (present & permanent)

NO BANK ACCOUNT?
NO ACCESS TO INTERNET?
CAN'T SUBMIT APPLICATION?
CONTACT STATE CONTROL ROOM
0370-2291120 / 0370-2291122


Please note that giving false information or any fraudulent practices will be dealt under relevant sections of Law.


Site may be unavailable due to maintenance between 4:00 PM - 5:00 PM daily.


21 APR 2020

FOLLOW US FOR OFFICIAL UPDATES

#STAYHOME

 NagalandMyGov

 MyGovNagaland

 MyGovNagaland

STAY SAFE

**GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND : KOHIMA**

No: DHFW/COVID-19/2019-20/

Dated Kohima, the 19th April 2020.

ORDER

In order to facilitate surveillance to tackle the COVID-19 pandemic, the department has developed a Mobile App known as "nCOVID-19 Nagaland Visitor's App".

In exercise of the powers conferred by the Nagaland Epidemic Disease (COVID-19) Regulations, 2020 under the Epidemic Disease Act 1897 and in the interest of public service, the following categories of contact persons shall mandatorily download the App from Google playstore and register:

1. All inbound travelers entering Nagaland.
2. All persons put on quarantine, either at home or institutional quarantine facility.
3. All persons in "at Risk" contact with positive case, as indicated by mobile footprints.
4. All persons in Contact Tracing Lists within the containment zone.

They are to "sign up" and update their sign/ symptoms status twice daily by 10.00 AM and by 7.00 PM till completion of quarantine period.

The instruction of how to use the app is given at Annexure 1.

Any act of non registration/ non-compliance shall be deemed to have committed an offence punishable as per the provisions of the Epidemic Disease Act, 1897.

(DR. VIZOLIE Z SUOKHRIE)
Principal Director
Directorate of Health & Family Welfare
Nagaland :: Kohima

No: DHFW/COVID-19/2019-20/

Dated Kohima, the 20th April 2020

Annexure 1 : How to use the App

- 1.1. Download the app from Google Playstore "nCovid-19 Nagaland visitor's-app"(if you have an earlier version downloaded, please uninstall and install the latest app from playstore)
- 1.2. If you have already registered in the App, then Login in with your registered mobile number.
- 1.3. If not registered earlier, select "Sign up", select "I am a citizen", register with your mobile number (OTP based authentication).
2. 1. If you are a traveler entering Nagaland, after login, please fill up the "self declare" form.
- 2.2. If you are within Nagaland, and isin quarantine (home or facility), after login, please select "have you been notified at risk" enter your phone number and quarantine start date.
- 3.1. Quarantine- daily reporting:
- 3.2. Go to "Home quarantine", fill up your symptoms twice daily for 14 days. Day 1 shall be the start date of quarantine.
- 3.3. Timing for daily symptom status reporting :
 - a. Morning 6:00 AM to 10:00 AM.
 - b. Evening 3:00 PM to 7:00 PM
4. Mobile GPS/location should be mandatorily enabled to submit daily report.
5. If you are iOS user, then go to the link:
Self Declaration for iOS User*
<https://www.nagalandhealthproject.org/covid/login-user.php>
6. If you have any technical issues please contact: 98560 67538 / 87949 44850

(DR. VIZOLIE Z SUOKHRIE)
Principal Director
Directorate of Health & Family Welfare
Nagaland :: Kohima



Dimapur, Rongchii/April 21, 2020: Alima ajunga asungba wara-COVID-19 anema raraba mapang, NITI Aayog ajanga NGO tem dang shilem tajung agitsü asoshi ayongzükba nung anidaka, YOUTH ALIVE SOCIETY, Dimapur Chairman Mrs. Sentikumla Longchar-i anir staff temi Mongolbarnü Nagaland Gate, Civil Hospital, Police Commissioner Office, City Tower, Plaza Point, Sub-urban Signal aser tanga tesemtem densema Super Market nungi Dillai Gate tashi police, health worker aser volunteer tem nem lemon juice lema agüja senzüba mapang agiba noksa ka yangi angur.



OFFICE OF THE
WAROMUNG VILLAGE COUNCIL

Dist. Mokokchung - 798601

P.O. Mangkolemba, B.P.O. - Waromung

Tepela Lemsateper

Alima ajunga nung Covid-19 wara ajanga yimtsüing aser jila ajak shibangba (lockdown) mapang kanga dang neburtem timtem nung lia, Shri. Imna Along Minister aser Shri. Dr. Longnirken Advisor Government of Nagaland tenadi Waromung yimtsüing nung koda masür teimtema alir kibongtem nem agütsüba (1) Jang, (2) Daal, (3) Potato, (4) Mustard Oil, (5) Sanitizer handgloves, mask. Mapang shidak nung lenir anadi agütsüba aser teyariteper ADC Mangkolemba, EAC Alongkima-i anir official ajak dang Waromung Council-i kanga pelar. Tarutsü lanu puto asoshi nenok taküm, sempet, rongsen aser areshi talang asen teyangluri moajangma.

Sd/-
T. Lanumeren Aier
Chairman
Village Council Waromung

Moasangba Longkumer
Secretary
Village Council Waromung



Samaritan Welfare Society Dimapur ajanga April 18, 2020 nü COVID-19 dak sendakba nung teintet rogotem (Old age persons) shia nem teyari jang seret 25 lema agütsüdang agiba noksa ka angur. (Dimapur, April 21, 2020)

Kohima nung Red Cross volunteer training agiogo

Kohima, Rongchii/April 21, 2020 (TYO): Tawa Red Cross Conference Hall, Kohima nung Red Cross volunteer tem atema training sentong ka ayongzükba agiogo, kong volunteer 25 agi iba training nung shilem agia liasü, ta sangdong ajanga metetdaksü. Iba training sentong nung Kohima Deputy Commissioner, Gregory Thejawelie NCS-i training agir volunteer tem ajungshi aser tang alima ajunga asungba wara - COVID-19 agi nüburtem rokongba mapang akok tashi pei sempet tajungtiba

amshia teyari agütsütsü asoshi pai mepishia liasü. Training sentong nung, Dr. Hoito Chishi-i 'Introduction on COVID-19' onük nung ajemdaker volunteer tem den jembia liasü. Kasa mapang NUHM Consultant Supongmenla Jamir-i 'District COVID-19 Strategy', DPM Kohima Avikali Jakhalu-i 'District Microplan on COVID-19' aser Dr. Toshimongla QA (DPM)-i 'Doffing & Donning of PPE' onüktem nung ajemdaker jembio, ta kasa sangdong ajanga metetdaksü.

Wokha DC-i metetdaksür

Dimapur, Rongchii/April 21, 2020 (TYO): COVID-19 wara azüoktsü asoshi India ajunga shibanger aliba mapang nung, Wokha district kübok district head quarter nung maliba office tekolaktem ajak dang pei mapa

inyakba tesemi aotsü atema Wokha DC nungi temelaba agitsü asoshi Wokha, Deputy Commissioner & Chairman District Task Force for COVID-19, Wokha, Orenthung Lotha-i sangdong ka ajanga tetuyuba agütsü.

Shamator Task Force senden agiogo

Dimapur, Rongchii/April 21, 2020 (TYO): Shamator nung COVID-19 atema shima yutsüba Task Force züngsemtem den külemi YTC, YAA, Chambers of Commerce Shamator, Public Forum Shamator, Ward lenirtem, DBs aser GBs nungi teshimtet züngsemtem DBs Court, Shamator nung rondak senden ka ayongzükba agia liasü, ta sangdong ajanga metetdaksü. ADC Shamator, Lankonsen Tsanglao lenisüba nung iba senden ya District

Administration-i ayongzük. Iba senden nung, Government of Nagaland Covid-19 ajanga tenokdangba shilem kar lapoktsütsü asoshi tuyuba indang nung ajemdaker jembishinüa liasü. Administration-isa, tenokdangba shilem kar lapokba ya züba züba dang magitsüla saka taoba mapang State Sorkar ajanga tuyubatem maneni anidaksü asoshi pei pei tesem nung tensa junga mita repringshimtsüla, ta senden nung shilem agir lenir ajak dang tekümdangtsü agütsüogo.

Real Kashmir FC-i PPEs, masks & gloves tenla agütsü

Srinagar, Rongchii/April (Agencies): The Real Kashmir Football Club (RKFC)-i novel coronavirus tashidak den raratsü asoshi health workers tem nem Personal Protection Equipments (PPEs) aser mask agüja Jammu and Kashmir administration nem teyari agütsüogo.

Club kibur Sandeep Chattoo-i Hombarnü Srinagar Deputy Commissioner Shahid Iqbal Choudhary nem PPE kits 150, gloves 3,000 aser surgical masks 15,000 agütsü. March 18 nü district nung mezüngbuba tashidak aliba putetba sülen Deputy Commissioner tejakdangser COVID-19 tashidak den raraba nung shilem agia arudar.

Tashidak prokshia meyoktsü asoshi jenjang tapet agi tatishitsü aketba mapang tajung inyakba atema Chattoo-i, Choudhary aser par team nem tenüngsang agütsüogo.

"Ni osettem tsüngdong oa DC nem agütsüner kechiyong pai pa tejakdang ser team anidar. District nung aliba nüburtem bendanga agüja tenzüksü asoshi pa par

kinungertem nungi pilar aliba onok ishikati dang meteta lir. Tang sorkar tetuyuba sülen anidaka asenok ajak kilung nungi madoki alitsü nungdaker aser asenok dak ajak keta lir," ta Chattoo-i ashi.

Pai ashiba agi, Jammu and Kashmir Lt Governor G C Murmu tawabangba kübok Chief Secretary BVR Subrahmanyam tetuyuba nung Deputy Commissioner-i anir Srinagar district administration-i kanga meranga inyakba den asatepra, oset agütsüba ya teyari agütsüba temaitsü tila ka dang lir.

"Ni oset tenla agütsüba ya asenok tashidak den raraba nung züyüm nung züjang ka jenoktsüba ama dang asütsü saka iba amala tensa tamajung mapang asenok ajaki tejakdangi arua pei akokba yari teyari agütsütsü nungdaker.

"Alima ajunga iba tashidak agi amokmerenba mapang ni health worker tem atema kanga shisabulua bilemer, shirnok tejakdang ser iba tashidak den raradar. RKFC nung sendaka alirtem ajaki doctors, nurses aser tanga health care worker

tem nem tenüngsang agütsü, shirnoki pei taküm lendong nung toktsür taküm bendanga agüja inyakdar," ta Chattoo-i ashi.

Kasa mapang nung Chattoo-isa, army BB Cantonment indang 92 Base hospital nung amshitsü asoshi PPE kits 150 aser surgical face masks 10,000 tenla agütsüogo. Iba mozüki ya XV Corps officers, jawans aser security forces tem atema kanga tongtibang lir aser mapang kar nungbo nüburtema iba mozüki nung anepalur. Osettem ya army nung ketdangsertem nem agüja liasü.

Tenla agütsüba sülen XV Corps General Officer-in Comamnd Lt Gen B S Raju-ia iba mapa tajung asoshi Chattoo nem tenüngsang agütsü aser ashiba agi, iba inyakyim ajanga Kashmir Valley nung army aser security forces o nüburtem tsüngda tesendaktep tajung aliba sayur.

"Onok tsüngda tesendaktep kanga tajung lir aser iba amala teyari mapa tajung kanga pelashishia agizüker aser asenok ajak longjemer COVID-19 tashidak koktettsü ta amanger," ta Lt Gen Raju-i ashi.

Jordan indang 'Dream Team' jersey \$ 216,000 yong ayok



New Delhi, Rongchii/April 21 (Agencies): 1992 küm Barcelona Olympics nung asema Michael Jordan indang U.S. Basketball "Dream Team" jersey ya USD 216, 600 yong yoka liasü, ta Hombarnü sangdong ka ajanga Robert Edwards Auctions-i metetdaksü.

1884 Olympic asayamung nung Jordan-i asema jersey ka USD 274,000 agi auction asüba sülen, Hombarnü Auction nung ayokba Jordan indang jersey ya jenjang timtiba agi ayokba jersey rongnung tanabuba asütsü.

Jordan-i iba jersey temesüng indang tuku achichilen "Best Wishes/Michael Jordan" ta zülur liasü.

Iba jersey ya 1992 küm

September ita gala charity auction ka nung mezüng USD 17, 500 agi alizüka liasü.

1992 küm Olympic asayamung Basketball asaya nung gold medal takok anguba U.S. tebur team - "The Dream Team" nung Jordan den külemi Hall of Famers Magic Johnson, Larry Bird, Scottie Pippen, Karl Malone, Patrick Ewing, Charles Barkley, Clyde Drexler, John Stockton, David Robinson aser Chris Mullin nunger densema liasü.

"Michael Jordan ya nungtugu athlete ka ama züngshir. Pai NBA title trok aser Olympic Gold Medal ana koktetogo," ta lir Robert Edward Auctions President, Brian Dwyer-i ashi.

IPL nung bowler tem rongnung Malinga tajungtiba

New Delhi, Rongchii/April 21 (Agencies): Sri Lanka aser Mumbai Indians nungi pace bowler Lasith Malinga ya Indian Premier League (IPL) asayamung puti otsü nung bowler tajungtiba lir, ta külem cricket asayar, shirnok tang comentator tem lir, parnoki asadangteta liasü.

Malinga, shiba IPL asayamung tenzüka mapang nungi Mumbai Indians telok nungi asaya arudar, pa nem 'bowler tajungtiba' tetushi ya Star Sports, commentator tem talisa Kevin Pietersen, Dean Jones, Mathew Hayden, Aakash Chopra, Graeme Smith, Simon Doull, Ian Bishop aser Tom Moody nungeri agütsü.

IPL asayamung nung wicket timtiba agisang (asaya 122 nungi wicket 170), Malinga ya T20 Cricket asaya yimya nung temelenshi adokdaksür rongnung ka lir aser iba den



külemi pai batsman tem kanga junga amokbanga asaya aruogo.

Sri Lankan nunger cricket asayar Malinga ya elite 10-bowler nominee list nung züngoksemogo aser iba awad atema pai tanga bowler Dale Steyn, Ashish Nehra, Sunil Narine aser Jasprit Bumrah nunger ajatetogo.

Iba award atema taoba England captain Pietersen-i Malinga shimtsü asoshi mulunga lir.

"Ni Lasith nem iba award

agütsütsü atema mulunga lir. Nisung ajaki jembitsüsa pai ball aonbatem aser yorker ball aonba yimyatem ya khenyongi balaka lir. Malinga ya ni atema tetemjen bowler ka," ta Kevin-i ashi.

"Narine ya bowler tajung ka, saka pai wicket agiyongjia bowling asüba yimya jangratemtsüka masü. Iba den külemi, asayamung kar nung Narine-i aonba ball yimyatem ya bowling yimya agi memelaba ta temulung melemi tashishiba ken o adokogo. Anungji, Narine melena Malinga ya bowler tajungtiba ama nibo asadangtetter," ta Kevin-i shisem.

Sri Lanka nunger cricket asayar rongnung ball pezü nung wicket pezü agisang Malinga-i iba nominee list atema tanga bowler Bhuvneshwar Kumar, Ashish Nehra, Ravichandran Ashwin, Amit Mishra, Imran Tahir aser Yuzvendra Chahal nunger tsükdaksüogo.

Bravo-i MS Dhoni atema ken ka mejemtsüba lemsatep

New Delhi, Rongchii/April 21, 2020 (Agencies): COVID-19 azüoktsü asoshi alima ajunga shibanger aliba mapang ka nung, West Indies nunger all-rounder aser Chennai Super Kings (CSK) nungi asayasang Dwayne Bravo-i külem asayar aser captain MS Dhoni atema pai ken tasen ka mejemtsüba lemsatepa liasü.

"Champion @DJBravo47 indang taruba ken ya tanga muddah nungi pa indang brudah (adianu) - @msdhoni No.7! atema lir," ta social media sabang ajanga CSK-i iba

ken indang teaser video ka lemsatep.

Fan tem atema "MS Dhoni, No.7" ta nungja agütsüba ken ya Dwayne Bravo-i lemsatepa liasü.

"Iba ya kü indang ken shilem tilaka lir aser ken ya kü adianu (Dhoni) atema yangludar. Tanga adianu ka nungi kü adianu atema ni iba ken yanglutsü," ta Bravo-i ashi.


"Ranchi nung alir ajaki MS Dhoni. MS Dhoni, No. 7 ta ayimtener. India nung ajungai Mahi aser Chennai nungi Thala ta ayimtener. MS Dhoni tenüng yagi alima nung nüburtem atsüa

arur," ta Bravo-i lemsatep.

Iba hopta tetenzüklen, Dwayne Bravo-i ashiba agi, Indian Premier League (IPL) nung CSK atema jembiba mapang MS Dhoni-i kü dak mulung toka liasü. Instagram live chat ajanga Bravo-i CSK den sensaksema mapang, Dhoni aser team head coach Stepehn Fleming napronglai pa dak temulung alemba atema pelaba metetdaksü.

"MS Dhoni aser coach Stephen Fleming napronglai kü kanga dang mulung atoker. Kü tebilemtem tenati agizüker," ta Bravo-i ashi.

Dingko Singh-i Delhi-i anir aotsü



Rongchii/April 21, 2020

(Agencies): Asian Games nung gold medal ngur aliba boxer Dingko Singh maneni temesen cancer anepalutsü asoshi Boxing Federation of India (BFI)-i April 25 nü New Delhi anir aotsü. Coronavirus tashidak pokteta senzügenpong nung tetsükdaksü adokba agitsü aliba magitet.

Arishi küm 41 tain asayar ya tang Imphal nung lir aser pa radiation therapy agitsü liasü, ajisüaka linük ajunga mokdanga ayuba ajanga pa Delhi-i motet. "Pa den tongtepratepogo

aser pa radiation therapy maneni agitsü atema air ambulance ka ajanga idaki anir arutsü," ta BFI Executive Director R K Sacheti-i PTI dang ashi.

Taoba mapang Sports Minister Kiren Rijiju-i Manipur sorkar dang pa temang asadangtsü asoshi aser mozüki anatiba nung pa temang anepalutsü atema teyari agütsütsü asoshi mepeshia asüngdangogo.

Dingko ya Arjuna and Padma Shri award anguba nisung ka lir aser pa temesen cancer agi kangashia arudar. Manipur nungba ya bantamweight boxer ka liasü aser Bangkok nung 1998 küm Asian Games nung pai gold medal nguogo.

Manipur nung radiation therapy facility maliba ajanga Dingko atema tanga lenmang kaji Guwahati nung temang anepalutsüba liasü.

Ajisüaka Sports Ministry source ajanga shiba agi, pai Delhi nung Institute of Liver and Biliary Sciences (ILBS) nung tanaben temang anepalunüa liasü.

BILEMDANGANG

"Kong temeim agi anunga lir idakji mepetmesü tali adoker."